

**Ekalesia Faapotopotoga Kerisiano Samoa**

# **AU TAUMAFAI KERISIANO 2019**

## **TAUTINOGA A LE AU TAUMAFAI KERISIANO**

*Ua ou faamoemoe i le faamalosi mai o Iesu Keriso ia te au  
**O LENEI, UA OU OSIA LA'U FEAGAIGA MA LE ALII**  
O le a ou taumafai ona fai mea uma e tusa ma lona finagalo*

*Ou te tatalo ia te Ia i aso uma*

*Ou te faitau i Lana afioga i aso uma*

*Ou te alo ese i inuga ava i aso uma*

*Ae le gata i lea, a o mea uma ua ou iloa e tatau ona ou faia, o mea ia  
ou te taumafai pea i ai i aso uma o lo'u ola.*

## **O LE ASO NEI, UA AVEA AI AU MA TAGATA O LE AU TAUMAFAI MO KERISO**

*Ou te matua faamaoni i le feagaiga ma le Au Uso, ou te alu ane i  
Potopotoga uma, ou te fesoasoani i ai, vagana ua faalavelaveina a'u  
i se mea ua silafia e Iesu, ua tatau ona fai ma faalavelave.*

## **IA FESOASOANI MAI LE ALII I LO'U TAUMAFAI**

**AMENE.**

**Niu Sila | Amerika | Ausetalia | Hawaii | Fiti | Ameika Samoa | Samoa**

## UPU TOMUA

I le suafa mamalu o le Ao o le Ekalesia o Iesu Keriso, e avea ai lo'u leo faatauvaa e fai ma sui o le Komiti o le Au Taumafai, e momoli atu ai le faafetai ma le faamalo e tusa ai i le maau foai paia o le Ekalesia e ala i lana faiga Taulaga o le Au Taumafai. E talitonu ma le lotomaulalo ana le seanoa lo outou lagolago mai, semanu e le mafai ona auau fuafuaga a le Komiti e tusa o le faatupeina o penisione o nai o tatou tama ma tina ua mapu i le galuega paia a le Atua.

E momoli atu foi le faafetai tele i le feagai ai o le Ekalesia ma a tatou sauniga faale-Au Taumafai o loo feagai ai i lea Aso Sa ma lea Aso Sa. Faamalo molimau. E le mafai foi ona faagaloina le faafetai i le Komiti o le Au Taumafai mai le nofo a Matagaluega; faapea foi le mamalu o le Laulau o le Au Taumafai i le Afioga i le Sui Peresetene, le Susuga i le Failautusi faapea le Teutupe mo le galueaina. Ia faamanuia le Atua ma ia foai pea lona tumu faaleagaga aua feau o loo outou mau tapuaaoina.

O la'u faafetai faapitoa, i Susuga i le Au fai Tusi o Sauniga o le Au Taumafai o lenei Tausaga 2019, le Susuga i le faafeagaiga ia Osa Nanai FS o le Aulotu i Caboolture i le Pulega a Purisipeni Matu, o le Matagaluega a Kuiniselani. E faapea foi le Susuga ia Faafetai Setefano FS, aulotu Lou Ola ia Aoga, Pulega Logan o le Matagaluega a Kuiniselani Saute. Faamalo tapena i le 'oa faaleagaga ua sasaa mai le faatamasoaliiga a le tautai o Agaga. Ia talosia ia maua se mau e tele i liu folau o le Sa faaleagaga o le Ekalesia i lenei Tausaga 2019.

Ia manuia tele feau faale-Au Taumafai a feagai ma le Ekalesia i lenei Tausaga 2019.

Alofa'aga ma Faamanuiaga mai:

Malifa T Malifa. FT  
**(Peresetene Komiti 'Au-Taumafai)**

ASO SA

06 IANUARI 2019

FAAFOUINA

**MANATU AUTU: “IA FAAFETAIA LE ATUA ONA O LONA ALOFA”**

*(Give thanks to God for His Love)*

**Tusi Faitau:** Salamo 136:1-22

**Matua:** Salamo 136:1-3

“Ia outou vivii atu i le Alii, aua e lelei o Ia; aua e faavavau lava Lona alofa. Vivii atu outou i le Atua o atua; aua e faavavau lava Lona alofa. Vivii atu ia outou i le Alii, aua e faavavau lava Lona alofa.”

1. O viiga, o le vaogagana o le tapuaiga
2. Faafetai i le Atua, ua tatou taunuu manuia mai i lenei Tausaga Fou
3. Faafetai i le Atua, aua o Lona alofa e tumau ma faamaoni
4. Faafetai i le Atua e tusa ma Lona faaaogaina o lou ola.

ASO SA

13 IANUARI 2019

**MANATU AUTU: “FAAMANUIA MAI LE ATUA I LONA ALOFA TUNOA”**

*(May God Bless us in His Mercy)*

**Tusi Faitau:** Numera 6:22-27

**Matua:** Numera 6:24-26

“Ia faamanuia mai oe e le Alii, ma ia na tausi ia te oe; ia faamalamalamaina e le Alii ona fofoga i luga ia te oe, ma alofa atu ia te oe; ia faasaga mai e le Alii ona fofoga ia te oe, ma tuuina atu ia te oe le manuia.”

1. Taitai malaga le Alii i lau savaliga i lenei tausaga
2. O le olaga nei, o lou faleaoga sili; e a’oa’o ma faatonu mai ai le Atua i lou ola
3. A masaesae lou la fala, faatu le la-afa o le faatuatua e te folau ai
4. Leoleo ma tausi mai i lo matou ola fia taumafai atu i lau Afio.

**ASO SA**

**20 IANUARI 2019**

**MANATU AUTU: “IA TATOU FAAMALOLOSI I LE TAUSINIOGA A FAIA NEI”**

*(Let us persevere in running the race)*

**Tusi Faitau:** Eperu 12:1-4

**Matua:** Eperu 12:1

“O lenei, o i tatou foi, o lo’o ua vagavagaia e le faapotopotoga o e matamata mai e faapea ona toatele, ina tatou tuuese ia o mea mamafa uma, atoa ma le agasala e faalavelavegofie ai i tatou, ia tatou taufetuli ma le onosai i le ala tanu o i o tatou luma.”

1. Tamoe o oe o le tagata tausinio mo le Atua
2. Aua e te faavaivai o loo toatele i latou o maimoa mai
- 3 Tausinio mo se viiga o le Atua i lou ola
- 4 O le Talavou tauivi ma ola finau e faamanuiaina.

**ASO SA**

**27 IANUARI 2019**

**MANATU AUTU: “E MANATUA E LE ATUA LANA FEAGAIGA E FAAVAVAU.”**

*(The Lord will remember His covenant forever)*

**Tusi Faitau:** Eperu 6:10-20

**Matua:** Eperu 6:13-14

“Aua a o folafola mai e le Atua ia Aperamo, ua le mafaia ona tauto o Ia i se tasi e sili ia te Ia, o lea na tauto ai o Ia ia te Ia lava, ua faapea mai, E moni lava ou te matua faamanuia ia te oe ma ou matua faatoateleina lau fanau.”

1. O le Atua tasi feagaiga ma le tagata le faamaoni
2. Onosai ma faapalepale e tali ai faafitauli o le valaauina
3. Galue ina ia maua le mea ua folafolaina
4. O fanau, o u fanafana i lima o le toa.

ASO SA

3 FEPUARI 2019

FAAFOUINA

**MANATU AUTU: “O LE MAUTINOA O OU FAAMOEMOEGA  
MO LE LUMANAI E FAATUPUTELEINA AI  
LOU FAATUATUA”**

*(The Clearer your goals the Greater your faith)*

**Tusi Faitau:** II Nofoaiga Tupu 1:1-12

**Matua:** II Nofoaiga Tupu 1:6-7

“Ona alu a’e lea o Solomona i lea mea i le fata faitaulaga apa memea i luma o le Alii, sa i le fale fetafai o le faapotopotoga, ma na fai i ona luga o taulaga mu e afe. Ua faaali mai le Atua i lea lava po ia Solomona ma faapea mai ia te ia, Ia e fai mai se mea ou te avatu ai ia te oe.”

1. E le galo i le Atua lou soifua faitaulaga mo Ia
2. Ia mausali lou ola tatalo
3. E faamaualugaina e le Atua le tagata loto maualalo
4. O faamanuiaga ua maua ona o galuega lelei a matua.

ASO SA

10 FEPUARI 2019

**MANATU AUTU: “E ILOA LOU LUMANAI, I FAATONUGA O  
LO’O E USITAI I AI”**

*(The instructions you follow, determine the  
future you create)*

**Tusi Faitau:** Teuteronomie 30:15-20

**Matua:** Teuteronomie 30:19

“Ou te valaau i le lagi ma le lalolagi i le aso nei e fai ma molimau ia te outou, ua ou tuuina atu i ou luma o le ola ma le oti, o le manuia ma le malaia; o lenei, ia e filifili i le ola, ina ia ola ai oe atoa ma lau fanau.”

1. Faalogo ma usitai, e leai se isi ala e ola fiafia ai
2. O avanoa faa’auro mo tagata uma
3. O le ola faamanuiaina, o le tali o lau filifiliga tatau
4. Alu ese ma tuinanauga o le olaga, e te oti ai.

**ASO SA      17 FEPUARI 2019**

**MANATU AUTU:**    **“O LE ALII O LO’U MALAMALAMA IA, MA  
LO’U OLATAGA”**  
*(The Lord is my Light and my Salvation)*

**Tusi Faitau:**      Isaia 9:1-7

**Matua:**            Isaia 9:2

“O le nuu sa savavali i le pouliuli, ua latou iloa le malamalama tele; o e sa nonofo i le nuu o le ata o le oti, ua pupula mai ia te i latou le malamalama.”

1. Faataoto e le Atua alafua o Lana faaolataga
2. Ua mavae le ola tuai, ua oo mai le ola fou
3. O le aoaiga e filemu ai
4. Foi i le Atua, o i ai le saolotoga moni.

**ASO SA              24 FEPUARI 2019**

**MANATU AUTU:**    **“E AU TUPULAGĀ FAAMANUIAGA A LE  
ATUA I TAGATA FAATUATUA”**  
*(The Lord’s Blessing is Everlasting to those Who Are Faithful)*

**Tusi Faitau:**      Salamo 128

**Matua:**            Salamo 128:5-6

“E faamanuia mai le Alii ia te oe mai Siona; ona e iloa atu lea le manuia o Ierusalem a i aso uma o lou olaga. E te iloa atu foi le fanau a lau fanau; e ia Isaraelu le manuia.”

1. Savavali i le finagalo o le Atua e ola manuia ai
2. E le masalomia le alofa o le Atua i le tagata faamaoni
3. O lau tautua faamaoni e manuia ai lou aiga
4. O tamai olive o le laoi paia.

ASO SA

3 MATI 2019

FAAFOUINA

**MANATU AUTU: “O LĒ LULU MA LOIMATA, E SELESELE  
MA LE ALAGA FIAFIA”**

*(Those who sow in tears, shall reap with shouts of joy)*

**Tusi Faitau:** Salamo 126

**Matua:** Salamo 126:6

“O le ua alu atu ma le tagi fano, o loo ave le saito e lulu, e foi mai lava ia ma le alaga fiafia, o loo aumai ana fusi saito.”

1. E le maua gofie le ola faamanuiaina
2. Afai e te lulu le paie, e te selesele le mativa ma le fiaai
3. E tauia au galuega lelei e te tautiga ai
4. O le mea e i ai le loto, e i ai le ala e fai ai.

ASO SA

10 MATI 2019

**MANATU AUTU: “O AFIOGA PAIA A LE ATUA O LONA  
POTO LEA”**

*(The Word of God is the Wisdom of God)*

**Tusi Faitau:** Faataoto 3:1-12

**Matua:** Faataoto 3:11-12

“Lo’u atalii e, aua le faatauvaia ia te oe le aoaiga a le Alii; aua foi e te inoino pe a aoaiina oe e Ia; aua o le ua alofagia e le Alii, e aoaiina ia e Ia e pei o le tama ona aoaiina o lona atalii ua ia fiafia i ai.”

1. O le Upu faatonu a le Atua
2. O le Poto e atamai ai le tagata usitai ma faalogo
3. O le Poto e lava ma totoe mo tagata uma
4. O le mata’u i le Alii o le amataga lea o le Poto.

**ASO SA**

**17 MATI 2019**

**MANATU AUTU: “FETALAI MAI E LE ALII, LE FILEMU I ONA TAGATA”**

*(The Lord speaks of peace to His people)*

**Tusi Faitau:** Ioane 14:25-31

**Matua:** Ioane 14:27

“Ou te tuuina atu ia te outou le manuia; o Lo’u manuia ou te avatu ai ia te outou; ou te le avatu ia te outou faapei ona avatu e le lalolagi. Aua le atuatuvaletu outou loto, aua foi tou te matata’u.”

1. O le manuia o le Atua o Lana meaalofa foaifua mo Lana tagata
2. Ia pule le filemu o le Alii i lou ola i aso uma
3. O le filemu o le Alii e te le tausui ai
4. Ou te taoto, ma ou moe filemu ona o le Alii.

**ASO SA**

**24 MATI 2019**

**MANATU AUTU: “O LE ALII, O LE AGALELEI MA LE ALOFA TUNOA LAVA IA”**

*(The Lord is Kind and Merciful)*

**Tusi Faitau:** Efeso 2:1-10

**Matua:** Efeso 2:6-7

“Ua na toe faatutu faatasi mai foi, ma faanonofu faatasi i tatou ma Keriso Iesu i mea o i le lagi; ina ia faaalua i tupulaga atali le silisili ese o le faulai o Lona alofa tunoa, i le agalelei mai ia te i tatou, ia Keriso Iesu.”

1. Fanaufouina i le alofa tunoa o le Atua
2. O le Faatuatua o le meaalofa foaifua a le Atua i tagata
3. Atiae lou ola faatuatua, i le tautuaina o le Ekalesia
4. O se ua ia Keriso o le tagata fou ia.



**ASO SA**

**31 MATI 2019**

**MANATU AUTU: “LE ALII E, TAITAI AU I ALA O LOU  
FINAGALO”**

*(Guide me Lord, in the way of Your commands)*

**Tusi Faitau:** Salamo 16:1-11

**Matua:** Salamo 16:11

“E te faailoa mai ia te au le ala o le ola; o i Ou luma le  
fiafia e malie ai; o i Lou itu taumatau le olioli e faavavau”

1. O ala o le Atua, e le o tatou ala ia
2. Usitai i ala ua faailoa mai e le Atua, e te ui ai
3. O le ala umi ma fepiopioa’i ae tau i le manuia
4. O Au afioga o le sulu i o’u vae ma le malamalama i o’u ala.

**ASO SA**

**7 APERILA 2019**

**FAAFOUINA**

**MANATU AUTU: “O LE ALOFA O LE ATUA, E FAAVAVAU  
MO E MATATAU IA TE IA”**

*(The Lord’s Love is everlasting to those who fear  
Him)*

**Tusi Faitau:** Isaia 40:25-31

**Matua:** Isaia 40:28

“E te le iloa ea? E te le i Faalogo ai ea? O le Atua o le vavau, o le Alii o le  
na faia tuluiga o le lalolagi, e le vaivai o ia, e le tigaina foi, e le  
masuesueina Lona mafaufau.

1. O le Atua, o ananafi, o le asō, e oo lava i le faavavau
2. O le faasiliga malosi mo e ua tau vaivai le faatuatua
3. Ia faatuatua, faalagolago ma faamoemoe i le Atua
4. E le vaivai le Atua, e avanoa pea mo oe i taimi uma.

**ASO SA**

**14 APERILA 2019 ASO SA O LE LAUPAMA**

**MANATU AUTU: “O LE AFIO MAI O LE TUPU”**

*(The coming of the King)*

**Tusi Faitau:** Ioane 12:12-18

**Matua:** Ioane 12:15

“Aua e te fefe, o oe le tama fafine o Siona; faauta, e afio mai lou Tupu, o loo tietie i le tamai asini.”

1. E faamaoni le Alii, i le finagalo o Lona Tama
2. E le fefefe ma le palaai gofie tagata o le Atua
3. Teuteu lou loto e afio mai i ai le Tupu
4. Faaaoga le malosi ua e maua e tautua ai le Alii.

**ASO SA**

**21 APERILA 2019**

**MANATU AUTU: “UA FAATAUNUINA E LE ATUA LANA FOLAFOLAGA E ALA I LE TOE FAATUINA MAI O IESU NAI E UA OTI”**

*(God has fulfilled His promise by raising Jesus from the dead)*

**Tusi Faitau:** Ioane 20:1-18

**Matua:** Ioane 20:13-14

“Ua la fai mai ia te ia, “Funa e, se a le mea e te tagi ai?” Ua faapea atu ia te i la’ua, “Aua ua latou aveese lo’u Alii, ou te lei iloa foi le mea ua latou tuuina ai o Ia.” Ua ia fai atu na upu, ona faliu lea i tua; ona iloa atu lea e ia o Iesu ua tu mai; a e lei iloa e ia o Iesu lava lea.”

1. O le faamoemoe ua taunuu o le laau o le soifua lea
2. O le galuega e tasi ae afe
3. Faaalia le Silisiliese, le Mamana ma lePule aoao a le Atua i mea uma
4. Saili i le Alii i taeao segisegi o aso taitasi.

**ASO SA**

**28 APERILA 2019**

**MANATU AUTU: “IA SAEIA O OUTOU LOTO A E LE O  
OUTOU OFU”**

*(Let your hearts be broken and not your garments torn)*

**Tusi Faitau:** Ioelu 2:12-14

**Matua:** Ioelu 2:13

“Ia outou saeia outou loto, a e le o outou ofu, ma toe foi i  
le Alii lo outou Atua; aua e alofa fua, ma alofa mutimutivale o Ia, e  
telegese lona toasa, ua tele foi lona alofa, e salamo Ia ona o le leaga.”

1. Foi i le Atua ma le loto ua salamo faamaoni
2. Aua le ola faafoliga, e le olegia le Atua
3. Fai se suiga fou o lou olaga
4. Faagalo mea sese o le tuanai, momo’e punouai mo le lumanai.

**ASO SA**

**5 ME 2019**

**FAAFOUINA**

**MANATU AUTU: “O AI E FAAMAUMAU LONA OLA ONA O  
A’U, E MAUA E IA LE FAAOLATAGA”**

*(Whoever loses his life for my sake, will find  
Salvation)*

**Tusi Faitau:** Luka 9:18-25

**Matua:** Luka 9:24

“Aua ai se fia faasaogalemuina lona ola, e maumau ai ia  
te ia; a o le faamaumau i lona ola ona o A’u, e faasaoina e ia.”

1. Aua le faamaumauina lou ola i mea le aoga
2. E le maua ma le filemu le faaolataga a le Alii
3. Manaomia pea ni faigaluega lototetele ma faamaoni
4. Faalogo ma talia le valaau mai a le Alii ia te oe.

**ASO SA**

**12 ME 2019**

**ASO SA O TINA**

**MANATU AUTU: “NAOMI MA RUTA... ALOFA MA LOTOMAU”** (*Naomi and Ruth... Love and Loyalty*)

**Tusi Faitau:** Ruta 1:1-22

**Matua:** Ruta 1:16-17

“A ua fai atu Ruta, aua e te finau ia te au ina ia ou tuulafoai ia te oe, ia le mulimuli atu ia te oe; aua o le mea e te alu i ai, ou te alu ai foi; o le mea e te nofo ai, ou te nofo ai, e fai lou nuu mo’u nuu, e fai lou Atua mo’u Atua; o le mea e te oti ai, ou te oti ai, e tanu ai foi a’u, ma ia faaopoopo i ai, pe afai e tuueseeseina i ta’ua ma oe i se tasi mea sei vagana le oti.”

1. O le alofa faa-tina o le Atua ia atagia i Lana EFKS
2. O le alofa faa-le-Atua ,ua soloia ai pa vaeloto o le faailoga tagata
3. O le foi i Peteleema a le tagata ua toilalo ma faiaina
4. E faaeaina e le Atua le tagata tausi matua.

**ASO SA**

**19 ME 2019**

**FONO TELE**

**MANATU AUTU: “O LE EKALEZIA FAAPOTOPOTOGA KERISIANO SAMOA O LE AVEFEAU OLE FEAGAIGA”**  
(*EFKS – The Messenger of the Covenant*)

**Tusi Faitau:** Malaki 3:1-12

**Matua:** Malaki 3:1

“Faauta, ou te tuuina atu La’u savali, na te sauni le ala i O’u luma; e faafuasei foi ona o’o mai i lona malumalu o le Alii, o le ua sailia e outou, o le agelu lava lea o le feagaiga, o lea ua outou naunau i ai; faauta, e afio mai lava o Ia, ua fetalai mai ai le Alii o Au.

1. Tapena lou lotoifale faale-agaga mo le afio mai o le Alii
2. Ia faamalosi le EFKS i lana galuega Faamisionare
3. E le tatau ona pule, pe a le mafai ona nofo i lalo o le pule a le tasi
4. Mafaufau pe le o oe le isi avefeau o loo faatali mai i ai le Alii.

**ASO SA**

**26 ME 2019**

**MANATU AUTU: “AFAI E TE TALITONU MA LOU LOTO  
ATO, E FAAOLAINA OE”**

*(If you believe with your whole heart, you will be saved)*

**Tusi Faitau:** Galuega 8:26-40

**Matua:** Galuega 8:36b

“Ua o ane foi i la’ua i le ala, ua oo i le tasi vai; ona faimai lea o le eunuka,  
“Faauta o le vai; se a ea se mea e vaoia ai au e aua le papatisoina o au?”

1. E faatauvaa oa o le lalolagi, i tamaoaiga o le Atua
2. O lou valaauina, o se laasaga sili ona taua o lou tala faasolopito
3. E aiaina e le Agaga o le Alii le loto o le tagata ua sauni mo Ia
4. Faitau le Tusi Paia e aumai ai lou faasinomaga tatau.

**ASO SA**

**2 IUNI 2019**

**FAAFOUINA**

**MANATU AUTU: “TATALO MO SE MANUIA O SAMOA”**

*(Pray for the Peace of Samoa)*

**Tusi Faitau:** Salamo 122:1-9

**Matua:** Salamo 122:6-8

“Aioi atu outou ina ia manuia Ierusalema; e manuia i latou o e alolofa ia te oe. Ia i ai le manuia i totonu o ou pa, o le manuia i totonu o ou maota. Ona o o’u uso ma a’u aumea mamae, ou te faapea atu ai lava, Ia ia te oe le manuia.”

1. Tatalo ina ia tumau Samoa i lona faavae: “Faavae i le Atua Samoa”
2. Taitai ina ia taitai ma le alofa ma fai le amiotonu
3. Ia faamanuia tele le Atua ia te oe Samoa
4. O Tupulaga lalovaoa, o le lumanai o Samoa mo a taeao.

**ASO SA**

**09 IUNI 2019**

**MANATU AUTU: “AVEA IESU MA MALAMALAMA O ONA TAGATA”**

*(Let Jesus be the Light of His people)*

**Tusi Faitau:** Ioane 8:12; 9:1-7

**Matua:** Ioane 8:12

“Ona toe fetalai atu lea o Iesu ia te i latou, ‘O A’u nei o le malamalama o le lalolagi; o le mulimuli mai ia te A’u, e le savali o ia i le pouliuli, ae ia te ia le malamalama o le ola.”

1. Finagalo le Alii ia savavali Lana fanau i Lona Malamalama
2. Avea le EFKS ma Taelega i Seloā, e sulufai i ai le fanau a le Atua
3. O le ao faaniutu i le ao ma le afi faaniutu i le po
4. Mulimuli ia Iesu; o Ia o le Ala, Upu moni ma le Ola.

**ASO SA**

**16 IUNI 2019**

**MANATU AUTU: “O LE OTI FAA-MATURO O SETEFANO ONA O LANA MOLIMAU”**

*(Stephen is martyred for his Testimony)*

**Tusi Faitau:** Galuega 6:7-12, 7:54-60

**Matua:** Galuega 7:60

“Ua tootuli foi o ia, ma alaga atu ma le leo tele, ‘Le Alii e, aua e te tuuina atu lenei agasala ia te i latou.’ Ua uma atu lea upu, ona moe ai lea o ia.”

1. Manatua nai o tatou matua o lagomau i nuu ese ona o le talaiga
2. O tiakono, ia moni le ofoina atu o le ola mo le Alii
3. O tagata tau o le Atua, e le fefefe i le oti
4. Fai lou ola ma pine faamau o lau tautua mo le Alii.

ASO SA

23 IUNI 2019

**MANATU AUTU: “O LE FOLAFOLAGA O LE  
FAAOLATAGA”**

*(The Promise of Salvation)*

**Tusi Faitau:** 1 Peteru 1:3-12

**Matua:** 1 Peteru 1:7

“O le tofotofu foi o lo outou faatuatua, e silisili ona aoga i le auro e faaumatia, e ui lava ina tofotofuina i le afi, e aveva ma mea e iu ai i le viiga, ma le mamalu ma le manuia pe a faaalua mai Iesu Keriso.”

1. O le faatuatua e moni, e pei o le auro e pupula malosia pe a susunuina
2. O puapuaga o le ola, e tofotofuina ai lou faamaoni i le Atua
3. Faamalosi i lau molimau mo le galuega faaola a le Alii
4. O folafolaga ma tautinoga le taunuu.

ASO SA

30 IUNI 2019

**MANATU AUTU: “IA OUTOU LOTOTETELE, UA OU  
MANUMALO I LE LALOLAGI”**

*(Be brave, I have conquered the world)*

**Tusi Faitau:** Faaaliga 3:14-22

**Matua:** Faaaliga 3:21

“O le manumalo ou te avatua ia te ia ma te nonofo faatasi ma A’u i Lo’u nofoalii, e pei o A’u foi ona ou manumalo, ua ma nonofo foi faatasi ma Lo’u Tama i Lona nofoalii.”

1. Tau le taua lelei mo le Alii
2. O le kerisiano faatuatua e toa le lotu
3. Aua le atua i le oa ma le tamaoaiga ua maua
4. E le o le tele o le tamaoaiga faaletino e faaolaina ai oe.

ASO SA

7 IULAI 2019

FAAFOUINA

**MANATU AUTU: “O LE AUAUNAGA FAA-SOO MONI O KERISO”**

*(True Discipleship of Christ)*

**Tusi Faitau:** Luka 5:1-12

**Matua:** Luka 5:11

“Ua latou tuta o latou vaa, ona latou tuu ai lea o mea uma, ae mulimuli atu ia te ia.”

1. O le galuega faa-soo moni o le Alii, e leai se taimi malolo
2. E lafoai le lalolagi ma ona tuinanauga, ae amo lou satauro ma mulimuli ia Keriso
3. O le ave fu’a o le Talalelei
4. E luitauina ae faamanuiaina.

ASO SA

14 IULAI 2019

**MANATU AUTU: “E FUATIA O TATOOU OLA E LE ATUA, I MEA TATOOU TE FAI.”**

*(Our lives will be judged by God, according to what we do)*

**Tusi Faitau:** Amosa 7:7-17

**Matua:** Amosa 7:8

“Ona fetalai mai lea o le Alii ia te au, Amosa e, se a ea se mea ua e iloa? I le ua ou faapea atu, o le fua faatautau. Ona fetalai mai ai lea o le Alii, Faauta, ou te tuuina se fua faatautau i totonu o lo’u nuu o Isaraelu, ou te le toe sopoia lava.”

1. O lo’o i le Atua le faamasinoga tonu
2. O au galuega e mulimuli mai ia te oe
3. E le o auaoa le lagi i le silafaga paia a le Atua
4. O Iesu le alafua mautinoa o le ola manuia.



**ASO SA**

**21 IULAI 2019**

**MANATU AUTU: “IA FAATAUA AVANOA UMA MAI LE ATUA”**

*(Take advantage of every opportunity from God)*

**Tusi Faitau:** Kenese 18:1-10

**Matua:** Kenese 18:3&4

“Ua faapea atu foi o ia, Le Alii e, afai ua alofaina mai nei au e oe, aua nei e maliu loa ia te au lau auauna; sei aumaia sina vai e mulumulu ai o outou vae, ma outou malolo i lalo o le laau.”

1. A maua loa avanoa mai le Atua, fai loa
2. E le iloa lava ala o le Alii
3. O avanoa o faamanuiaga e le maua soo
4. Aua nei masalosalo i folafolaga a le Alii.

**ASO SA**

**28 IULAI 2019**

**MANATU AUTU: “O LE MANA O LE TATALO”**

*(The power of prayer)*

**Tusi Faitau:** Luka 11:1-13

**Matua:** Luka 11:9

“Ou te fai atu foi au ia te outou, Ia outou ole atu, ona foaiina mai ai lea ia te outou; ia outou saili, ona outou maua ai lea; ia outou tuitui atu, ona toina mai ai lea ia te outou.”

1. Ia silafia e fesootai i le Atua
2. Saili i le Atua e le aunoa e ala i le tatalo
3. E faafofoga le Atua i a tatou tatalo
4. O le tatalo e le na o upu ma laugutu, a o le loto ia faamaoni.

ASO SA

4 AOKUSO 2019

FAAFOUINA

**MANATU AUTU:** “E LE TUULAFOAIINA E LE ATUA ONA TAGATA”

*(God never abandons his people)*

**Tusi Faitau:** Hosea 11:1-12

**Matua:** Hosea 11:8

“Efaraima e, ou te mafai faapefea ona tuu atu ia te oe? Israelu e, ou te tuuina atu oe faapefea? Ou te mafai faapefea ona tu’uina atu o oe e pei o Atama? Ou te tuuina atu oe faapefea e pei o Sepoima? Ua liua lo’u loto i totonu ia te au; atoa foi ma lo’u alofa mutimutivale ua tupu.”

1. O le Atua e soifua e faavavau
2. O le Atua o le alofa faavavau
3. O le Atua e auai e faavavau
4. O le leoleo e faavavau

ASO SA

11 AOKUSO 2019

ASO SA O TAMĀ

**MANATU AUTU:** “O LE ALOFA FAA-TAMĀ E MONI”

*(A true fartherly love)*

**Tusi Faitau:** Luka 15:11-24

**Matua:** Luka 15:20

“Ona tulai lea o ia ua alu i lona tama. Ua iloa mamao atu foi o ia e lona tama, ona mutimutivale lea o lona alofa; ua momo’e atu o ia, ua fusi ia te ia, ma sosi atu ia te ia.”

1. E le tau i le leaga o le fanau, ae faamagalol
2. E onosai ma faapalepale
3. O le alofa e tuuavanoa
4. Soo se mafutaga e i ai le alofa faa-tama e moni, e ola fiafia ma sologa manuia.

**ASO SA**

**18 AOKUSO 2019**

**MANATU AUTU:** **“E MAFAIA MEA UMA I LE FAATUATUA”**  
*(In faith everything is possible)*

**Tusi Faitau:** Eperu 11:29-12:2

**Matua:** Eperu 11:32-33

“Se a foi la’u e toe fai atu? Aua e saasaa le aso e tala atu ai ia Kitiona, ma Parako, ma Samasoni, ma Iefata, ma Tavita, ma Samuelu, ma le au perofeta; o e na faatoilaloina malo i le faatuatua, na fai ai amiotonu, na maua ai mea na folafolaina, na pupuni ai gutu o Leona.”

1. E gata le malosi o le tagata, ae leai se mea e gata mai ai le malosi o le faatuatua
2. Ua na o le faatuatua e manino ai lau vaai i le silisiliese o le Atua
3. E matutu loa le ola faatuatua, leai se alu i luma ae na o le solo i tua
4. E le mafai ona faatoilaloina le Ekalesia ua maua’a le faatuatua.

**ASO SA**

**25 AOKUSO 2019**

**MANATU AUTU:** **“O LE TAITAI ALOFA”**  
*(A compassionate leader)*

**Tusi Faitau:** Isaia 58:9-14

**Matua:** Isaia 58:11

“E taitaiina foi oe e le aunoa e le Alii, e faamalie foi o ia ia te oe pe a oge vai, ma faamalosia ou ivi; e avea foi oe e pei o se fanua ua faasusuina, e pei o le punavai foi e le mate ona suavai.”

1. Ia taitai tagata i le mea e manuia ai
2. Aua le manatu faapito, ae amanaiaina lagona o tagata uma
3. E faamalieloto, e faamalosiau
4. O le punavai ola mo le ua mafatia.

**ASO SA**

**1 SETEMA 2019**

**TALALELEI**

**MANATU AUTU: “AMATAGA O LE TALALELEI”**

*(Beginning of the Gospel)*

**Tusi Faitau:** Mareko 1:1-8

**Matua:** Mareko 1:1

“O le amataga o le Talalelei ia Iesu Keriso o le Alo o le Atua”

1. O le Talalelei e amata mai le Atua
2. O le Talalelei, o le tala ia Iesu Keriso le Alo o le Atua
3. O le amataga o le galuega faaola a le Atua
4. E amata le tagata i le salamo.

**ASO SA**

**8 SETEMA 2019**

**MANATU AUTU: “FAALOGO I LE UPU A LE ALII”**

*(Hear the Word of God)*

**Tusi Faitau:** Ieremia 2:4-13

**Matua:** Ieremia 2:4

“Le aiga o Iakopo e, ma ituaiga uma o le aiga o Isaraelu, ina faalogologo mai ia outou i le Afioga a le Alii.”

1. O le Upu a le Alii, o le Upu foafoa
2. O le Upu a le Alii, o le Upu o le ola
3. Ia faalogo i le Upu a le Alii ma ola ai
4. Ua liutino tagata le Upu a le Alii.

**ASO SA**

**15 SETEMA 2019**

**MANATU AUTU: “LOTO UA FAAFOUINA”**  
*(Renewed Heart)*

**Tusi Faitau:** Salamo 51:1-10

**Matua:** Salamo 51:10

“Le Atua e, ia e faia se loto mama mo au; ma ia  
Faafouina se loto mau i totonu ia te au.”

1. O le loto ua pule ai le Alii
2. E iloa atu le Atua e le ua i ai le loto ua mama
3. E taua i le Atua loto ua Faafouina
4. O le tagata fou, o le ua i ai le loto ua Faafouina.

**ASO SA**

**22 SETEMA 2019**

**MANATU AUTU: “FAATULAGA SA’O LAU FAAMUAMUA”**  
*(Set your priorities right)*

**Tusi Faitau:** Luka 16:1-13

**Matua:** Luka16:13

“E le mafai se auauna ona auauna i alii e toalua; aua e  
inoino o ia i le tasi, a e alofa atu i le tasi; a le o lea, e  
faapipii atu ia i le tasi, ae faaleaoga i le tasi. Tou te le  
mafaia ona auauna i le Atua atoa ma le oa.”

1. Ia faamuamua le Atua
2. Aua le Savea tu vae lua
3. E sese loa le amataga, sese foi le faaiuga
4. Tuu atoa lou loto i le mea e sili ona taua.

**ASO SA**

**29 SETEMA 2019**

**MANATU AUTU: “O FILIFILIGA ATAMAI”**

*(Wise decisions)*

**Tusi Faitau:** Iosua 24:14-18

**Matua:** Iosua 24:15

“Pe afai foi e leaga ia te outou ona auauna i le Alii, ina filifili ia o outou i le aso nei, po’o ai tou te auauna i ai, po’o atua na auauna i ai o outou tama, o e sa i le la itu o le vaitafe, po’o atua o sa Amori, e o latou le nuu ua outou nonofo ai; a o au nei ma lo’u aiga, matou te auauna i le Alii.”

1. O filifiliga e vaai mamao mo se lumanai manuia
2. Ia lē filifili ma le manatu faapito
3. Aua le seetia i le matagofie o le tino mai o mea
4. Ia filifili faatasi ma le Atua.

**ASO SA**

**6 OKETOPA 2019**

**FAAFOUINA**

**MANATU AUTU: “O AUAUNA LE AOGA I TATOU”**

*(We are worthy servants)*

**Tusi Faitau:** Luka 17:5-10

**Matua:** Luka 17:10

“E faapea foi outou, pe a uma ona fai o mea uma na poloaiina atu ia te outou, tou te fai ane, O auauna le aoga i matou nei, aua o mea e tatau ona matou fai, o mea ia ua matou faia.”

1. Galulue mo le viiga o le Atua
2. O tatou, ua na o ni mea faigaluega a le Alii
3. Auauna e aunoa ma le faitauina o ni o tatou aoga
4. E le faatusatusaina ni a tatou auaunaga i le tautua a Keriso.

ASO SA

13 OKETOPA 2019

LOTU TAMAITI

**MANATU AUTU: “O FANAU O U FANAFANA I LE LIMA O LE TOA”**

*(Children are like arrows in a soldier’s hand)*

**Tusi Faitau:** Salamo 127

**Matua:** Salamo 127:4

“E pei o u fanafana i le lima o le toa, e faapea lava atalii o taulelea.”

1. O fanau o le tofi mai le Atua
2. Ia a’oa’o fanau i ala o le Alii, ona avefa lea ma u e malu ma manuia ai aiga
3. O taiala sili o fanau manuia
4. O fanau o le faamoemoe mo nei, taeao ma le lumanai o aiga, atunuu ma le Ekalesia.

ASO SA

20 OKETOPA 2019

**MANATU AUTU: “E LIAIINA MA TOE TOTOINA MO LE FAAMOEMOE”**

*(Uprooted and re-planted for a purpose)*

**Tusi Faitau:** Ieremia 31:27-34

**Matua:** Ieremia 31:28

“E pei ona ou lamalama ia te i latou, ina ia ou liaiina, ma lepetia, ia ou soloia foi, ma faaumatia, ma faatigaina; e faapea foi ona ou leoleo ia te i latou, ia ou atiina ae, ma totoina, ua fetalai mai ai le Alii.”

1. O le tofa fetuutuunai a le Atua
2. E aveeseina mai le ola tuai, ina ia ola i se ola fou
3. E le tuufauina e le Atua ae toe fuataiina
4. Ua na o le Atua e silafia ma faia le mea sili mo ona tagata.

**ASO SA**

**27 OKETOPA 2019**

**MANATU AUTU: “E FAIA E LE ALII MEA TETELE”**

*(God does great things)*

**Tusi Faitau:** Ioelu 2:21-32

**Matua:** Ioelu 2:21

“Le fanau e, aua e te fefe; ia e fiafia ma olioli, aua e faia e le Alii mea tetele.”

1. O le Atua fai mea ofoofogia
2. Ua tala mai e le foafoaga, ua faailoa foi i ana afioga paia, galuega tetele ua faia e le Atua.
3. E le fefe, ae fiafia ma olioli le ua talitonu i mea tetele ua faia e le Atua
4. O Iesu le atoaga o mea tetele ua faia e le Atua.

**ASO SA**

**3 NOVEMA 2019**

**FAAFOUINA**

**MANATU AUTU: “IA MANATUA LOU ATUA”**

*(Remember your God)*

**Tusi Faitau:** Teuteronomie 6:10-15

**Matua:** Teuteronomie 6:12

“...ia oe, nei galo ia te oe le Alii na na aumaia oe nai le nuu o Aikupito, o le mea sa nofo pologa ai.”

1. Ia manatua pea aso o le leaga, pe a o’o ina sapi i faamanuiaga
2. Ia manatua le alofa o le Atua
3. A e taumafa ma laulelei i le faasoaa a le Atua, aua nei galo sau faafetai
4. E lelei le galo si’o, ae leaga le galo nimo.



**ASO SA**

**10 NOVEMA 2019**

**MANATU AUTU: “O LE PULE AOA O A IESU”**  
*(Jesus’ Rule)*

**Tusi Faitau:** Mataio 8:23-27

**Matua:** Mataio 8:26

“Ona fetalai atu ai lea o ia ia te i latou, “Se a le mea ua outou matatau ai, outou e faatuatua ititi? Ona tulai ai lea o ia, ua vavao i le matagi ma le vai, ona tele ai lea o le malu.”

1. E tuaoi afa ma maninoa i le pule a Iesu
2. Folau faatasi ma Iesu i aso uma, ona le popole lava lea i se mea e tasi
3. E faalologo mea uma i le pule aoao a Iesu
4. E toamalie le ola ua tautai ai le pule a Iesu.

**ASO SA**

**17 NOVEMA 2019**

**MANATU AUTU: “E LE AVEA NI TOE MEA I LE ATUA”**  
*(We do not give to God whatever is left)*

**Tusi Faitau:** Isaia 44:13-21

**Matua:** Isaia 44:17

“O le mea foi ua totoe na te fai a’i se atua, o lana tupua ua ta; ua ifo fao i ai, ma tapuai atu i ai, ua ia tatalo foi i ai, o lo’o faapea atu, Ia e laveai mai ia te au, aua o lo’u atua lava oe.”

1. E le toina i le iu le inati o le Atua
2. O le Atua o mea atoatoa
3. Le Atua e muamua, tatou e mulimuli
4. E lei aumaia e le Atua se toe mea, a o le soifua atoa o lona Alo o Iesu Keriso, mo lo tatou faaolaina.

ASO SA

24 NOVEMA 2019

FAIGA TAULAGA

**MANATU AUTU: “E SILASILA LE ATUA IA I TATOOU ATOA  
MA**

*(God sees us and our offerings)*

**Tusi Faitau:** Kenese 4:1-6

**Matua:** Kenese 4:4

“A o Apelu, ua ia avatu foi uluai tama a lona lafu, o e pepeti ai lava. Ua silasila mai le Alii ia Apelu atoa ma lana taulaga.”

1. E le o le faitau aofai, a o le loto e fai a’i
2. E le foi fua lou soifua fai taulaga mo le Atua
3. Ia fai taulaga mo le viiga ole suafa o le Alii, ae le o le tagata
4. O mea sili ua tatou maua faatasi ma o tatou tagata atoa, ia faitaulaga ai mo le Alii.

ASO SA

1 TESEMA 2019

FAAFOUINA

**MANATU AUTU: “O TATOOU O MOLIMAU MA AUAUNA  
FILIFILIA A LE ALII”**

*(We are the chosen witnesses and servants of the Lord)*

**Tusi Faitau:** Isaia 43:6-12

**Matua:** Isaia 43:10

“Ua fetalai mai le Alii, o outou o a’u molimau, ma la’u auauna o le na a’u filifilia; ina ia outou iloa, ma ia outou faatuatua mai ia te a’u, ma ia outou lagona, o a’u lava o ia; e leai se atua na gaosia e muamua ia te a’u; e leai foi se tasi e mulimuli ia te a’u.”

1. Molimau atu e leai se isi Atua e tusa ma le na filifiliaina i tatou e fai mana auauna
2. O le ola molimau e o faatasi ma le ola auauna
3. O le Ekalesia o le molimau ma le auauna a le Alii
4. Ia atagia i o tatou olaga i aso taitasi lo tatou ola molimau, i le paia ma le silisili ese o lo tatou Alii.

ASO SA

8 TESEMA 2019

**MANATU AUTU: “O LO’O I LE LUMANAI LO TATOU  
FAAMOEMOE MAUTINOA”**

*(There is great hope ahead of us)*

**Tusi Faitau:** Ieremia 29:4-14

**Matua:** Ieremia 29:11

“Aua o au nei, ua ou iloa manatu ua ou manatu ai ia te outou, o manatu i le manuia ae le o le malaia; o loo fetalai mai ai le Alii, e foaiina atu ia te outou le iuga e iai le faamoemoe.”

1. Ua silafia e le Atua le mea sili mo ona tagata
2. Malaga ma le mautinoa e iai le faamoemoe o loo i le lumanai
3. Agai i luma, e leai se faamoemoe i le tumau i le mea e tasi
4. Ua mae’a tapena e le Atua lo tatou faamoemoe mautinoa i le lumanai, e ala i lona Alo o Iesu.

ASO SA

15 TESEMA 2019

ETIVENI

**MANATU AUTU: “O LE LEOLEO MAMOE LELEI”**

*(The good shepherd)*

**Tusi Faitau:** Esekielu 34:1-10

**Matua:** Esekielu 34:2

“Le atalii e o le tagata, ia e vavalu atu i leoleo mamoe o Isaraelu, ina vavalu atu ia, ma e fai atu ia te i latou, o leoleo mamoe lava,ua faapea ona fetalai mai le Alii le Atua, oi talofa i leoleo o Isaraelu o e fafaga ia te i latou lava! E le tatau ea i leoleo mamoe ona fagaina o le lafu?”

1. O le leoleo mamoe lelei e fafaga i le lafu mamoe, ae le o ia lava
2. O le leoleo mamoe lelei, e faalogo mamoe i lona leo, e lalata i ai ma mafanafana le mafutaga
3. O Iesu le leoleo mamoe silisili ona lelei
4. Ia faalogo le leoleo mamoe i afioga a le Alii.

**ASO SA**

**22 TESEMA 2019**

**ETIVENI**

**MANATU AUTU: “O LE FAAILOGA O LE ALOFA SILISILI  
ESE O LE ATUA”**

*(The sign of God’s greatest Love)*

**Tusi Faitau:** Luka 2:1-20

**Matua:** Luka 2:12

“O le faailoga lenei ia te outou, e iloa e outou le tama meamea ua aui i le ie o loo taoto i le fale o manu.”

1. O le faailoga o le loto maulalo ma le filemu
2. O le faailoga o le alofa sa lilo a ua fai tino
3. Ua fanau le tama o le Folafolaga
4. O Iesu le faailoga o le alofa faaola o le Atua mo le lalolagi.

**ASO SA**

**29 TESEMA 2019**

**ETIVENI**

**MANATU AUTU: “O LE ONOSAI, AE LE O LE  
FEMOUMOUA’I”**

*(it’s patience, not deviation)*

**Tusi Faitau:** Iakopo 5:7-11

**Matua:** Iakopo 5:8

“Ia onosai foi outou, ia faatumauina o outou loto; aua ua latalata le afio mai o le Alii.”

1. E le iu lelei le tagata e ola femoumouai
2. Aua le femoumouai ae onosai, ua lata lona toe afio mai
3. E le’i femoumouai le alofa o Iesu, ae na onosai se’ia o’o i le iuga
4. E tauia e le Atua le auauna, e onosai se’ia o’o i le taunuuga o le tausinioga.